

[Augsburg], 7. Juli 1567

An Johannes Oporinus

UB Basel, Fr. Gr. I 11, fol. 297r.
Steinmann Nr. 786.

S. Nobiles istos Polonos, quos scribis, cras, vt opinor, videbo. Isocratem diuidito et tractato, arbitratu tuo, modò mendae pro virili caueantur. Canterum quanti faciam, nuper ad te scripsi: quem correctorem ex animo mihi gratulor: quicquid ille in scriptis meis annotarit et mutarit, te ratum habere velim: aut castigationes eius seorsim scriptas (si vtrique vestrum ita visum fuerit) meis scriptis subijcere. De editione magni operis, facito quod visum tibi fuerit. In isto paruo, fac praefatio ad Caesarem, vnà cum versibus excudatur: additamentis caeteris omnibus in commentarios reseruatis. Consilium tuum de Demosthene libens adiuuero, cuius hac aestate absoluendi desperatio me traduxit ad commentarios Officiorum, et reliquorum libellorum corrigendos, quos vt per hyemem excudas, operam dabo: eoqüe labore defunctus, redibo ad Demosthenem, qui graecolatinus quatuor iustos libellos conficit. Eum vt dimidium saltem ante Cal[endas] Aprilis anni 68 accipias, sedulò admittar. Gnomologiam Isocraticam graecè ordine excerptam habeo, sed nondum planè conuersam: quae conuersio vno mense facilè absoluetur. Digestionem in locos certos, alterius industriae libenter concedam: grauioribus ipse operis vacaturus. Phraseologiae perficiendae paruam spem, atque adeo ne voluntatem quidem habeo magnam: cùm quòd rudis et indigesta illa moles, quam partim conscripsi, partim in vnius vsum, notis distinxii, quas notas alij fortasse non rectè accommodabunt, maior est, quàm vt eam sustinere posse videar: tum quod Henrici Stephani praeclarum opus sub praelo esse aiunt, ὡς ἀληθῶς κέρας ἀμαλθείας. Vale et D. Zwingero, D. Carino, et Cantero per occasionem meo nomine multam salutem. Nonis Iulij, quo die tuas accepi. 1567.

Hiero[nymus] Wolfius
T[uus].